

Date – 31/08/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram chak lakna kawngpui Aizawl atanga Silchar panna chu tunlai hian a chhiat nasat avangin National Highway paltlang khua ten harsatna hrang hrang an tawh thu an sawi.
2. Social Welfare Minister Pi Lalrinpuii'n Mizoramah HIV/AIDS a hluar zel loh nan theihtawp chhuah ani a ti a, sawrkar leh tlawmngai pawl bakah kohhran te nen hma an la mek a ti.
3. Mizoram in kawlphehtha a mamawh san lai ber chu megawatt 181 point 62 a ni a, a thlen hun hi kumin January ni 6 tlai lam dar 5 kha a ni.
4. India leh Uzbekistan chuan an thawhdunna neih mek chu ti sangin Comprehensive Strategic Partnership ah an hlangkai.

<><><>

POOR ROAD CONDITION

Mizoram chak lakna kawngpui Aizawl atanga Silchar panna chu tunlai hian a chhe zual hle a, Kolasib District-a National Highway paltlang khua ten kawngchhia avang hian harsatna hrang hrang an tawh thu an sawi.

Mizoram chak lakna kawngpui pawimawh tak National Highway 306 leh National Highway 06 chu tunlai hian a chhe nasa hle a, Akashvani News in National Highway paltlang khuaa cheng te a biakpawhna ah kawngpui chhia avang hian mipui, lirtheia eizawng leh sumdawnge an mangan hle a, harsatna hrang hrang an tawh thu an sawi a ni.

Hetihlai hian PWD Minister, Pu Vanlalhlana'n Mizoram hmun thenkhata kawngpui chhia chu Department-in a hriat thu sawiin ruahtui hul velah hmun 19 thlan bikah hmalak nghal a nih tur thu Assembly thutkhawmah a sawi a, Minister chuan kawng chhia siam that dan tur ruahmanna hrang hrang siam a ni tiin kawngpui chhe zual thlan bik hmun 19 an nei tawh a, fur ruahtui a reh fel hunah bultan nghal a ni dawn a ti a, Kawngpui siam chu Aizawl atangin an tan tih sawiin Aizawl bik chu tun dinhmunah a that tawh avangin District dang siam hmabak a ni tih a sawi.

Mizoram hmun dangah kawng chhia tam tak awm mahse kan mamawh tam ber kan chawkluhna Aizawl leh Silchar inkar kawngpui hi a pawimawh em avangin ngaihthah rei chi a ni lo va, he kawngpui hi chhiat loh kum a awm meuh lo thin a tih theih awm e.. Fur laiin hna a thawh mumal theihloh avang leh hnathawh hun chhung a tawi viau chung hian inhmakhuaa hnathawh erawh a tam lo hle thin niin a lang. Tuna kawng chhia pawh hi hun reilote chhunga mam leh mawi taka siam vek chu a harsa ang tih a rinawm, chutih rual erawh chuan ruahtui hul huna siam thuai anih theih nan ruahmanna tha erawh a mamawh hle a ni.



RAMTHAR NI

Vawiin hi ‘Ramthar Ni’ a ni a, Mizorama Presbyterian Kohhran rawn dintu Rev. David Evan Jones (Zosaphluia) Mizorama rawngbawl tura a lo thlen ni a nih vangin Mizoram Presbyterian Kohhran tan ni pawimawh bik a ni.

Kum 1972 Mizoram Synod Inkhawmpui chuan, Synod Ramthar Board-in, 'August 31 Pu Zosaphluia Mizorama a lo thlen ni hi Synod Ramthar Ni atan hman ni se,' tia a rawtna chu pawmin kum 1973 atang khan August 31 chu Ramthar Ni atan hman tan a lo ni ta a ni.

Mizoram Presbyterian Kohhran chuan kumin Ramthar Ni pual hian tum khat inkhawm atan programme a siam a, thupui inang "Hawh u, lal chhungte i va hrilh ang u" tih chu zir ho a ni ang.



ZMC&H

Assembly fur inkhawm neih zawh takah Health Minister Lalrinpuii chuan ZPM Member H Ginzalala zawhna ziaka chhangin Zoram Medical College & Hospital (ZMC&H) tih changtlunna atana sorkar hmachhawp hrang hrangte a tarlang a, ZMC&H tih changtlun avang hian nasa takin phai lama inenkawl tura damlo chhuak an tlem phah, a ti.

ZMC &H tih changtlun leh hmachhawp zingah Cardiothoracic & Vascular Surgery (CTVS) Operation Theater bil hi tih changtlun mek a ni a. Neuro Surgery Unit bun thar tura ruahmanna siam mek a ni bawk a. Cardiology service tih changtlun nan Cath-Lab nei tura ruahman mek niin Diathermy khawl, C-arm khawl leh Advance Life Support Ambulance 1, CSR funding atangin Zoram Medical College & Hospital-in a dawng bawk a ni.



SOCIAL WELFARE MINISTER

Social Welfare Minister Pi Lalrinpuii’n Mizoramah HIV/AIDS a hluar zel loh nan theihtawp chhuah ani a ti a, sawrkar leh tlawmngai pawl bakah kohhran te nen hma an la mek a ti.

Pi Lalrinpuii hian social media kaltlangin he thu hi a sawi a, inrinni khan Council of Churches in Mizoram (CCM) leh MKHC hruaitute nen, Mizoram a HIV/AIDS vei an lo tlem theih nan inkawmin hmalak dan tur hrang hrang an sawiho a, inkawmna chuan rah tha a chhuah ngei a beisei a ti bawk.

Minister chuan ruihhlo ngai enkawlna Hulhliap Short Stay Centre ah Batch pakua (9) buatsaih niin, admission ti zat hi mi 2255 an awm a ti a, cheng nuai 386.63 hman ral tawh niin sawrkar nilo hmundang atanga tanpuina Rs. 1,34,350/- a lut tawh a ti bawk.



NQAS

Mizoram chhunga Sorkar damdawi in 122-te chu India rama Sorkar damdawiin tha bik tehna NQAS-ah an tling tawh a, damdawiin 122 zinga 93 chu National Certified an ni tawh.

Assembly fur thutkhawm zawh takah Health Minister PI Lalrinpuii chuan Aizawl West 3 MLA Pu VL Zaithanzama zawhna ziaka a chhanna ah he thu hi a sawi a, Pi Lalrinpuii chuan NQAS Certificate hmu tur hian tehfung bik, National Health Systems Resource Centre, Ministry of Health & Family Welfare, New Delhi in India ram puma in ang tlanga hman tur atana an siam, NQAS Checklist hmanga teh a nih thu a sawi a, NQAS chuan damdawiin quality hmasawn zelna tur atan pawisafai hamthatna (Cash Incentive) a ken tel thu a sawi bawk.

Minister chuan Mizoramin State dangah MBBS quota an la nei tih sawiin Regional Institute of Medical Sciences (RIMS) Manipur ah seatt 7 an nei a ti a, Agartala Govt. Medical College ah seat 2 a awm thu a sawi bawk.

<><><>

COVID-19

Tun hnai-a Mizoramah Covid-19 hri kai tlemin an pung thar chho leh hret.

Health department hnuai a Integrated Disease Surveillance Programme (IDSP) a thawkte hnen atanga thudawn danin tun dinhmunah hian Covid-19 hri kai enkawl hi Inrinni khan 7 an awm a. August ni 21 khan hri kai enkawl hi 1 chauh awm tawhin hri kai thar an awm ta mai lova. Kar kal ta Nilaini (August ni 26) khan sample 32 endik zingah mi 3-in Covid-19 an kai tih hmuhchhuah a ni a. Ningani khan report a awm lova, Zirtawpni khan sample 20 endik zinga 2-in an kai tih hmuhchhuah a ni leh a. Inrinni khan mi 12 endik zingah mi 2 bawk chu Covid-19 hri kai hmuhchhuah leh a ni. IDSP a thawkte chhinchhiah danin kumin chhung hian mi 875 endik zingah Covid-19 hri kai mi 134 hmuhchhuah tawh a ni a. May thla leh August thla bul khan hri kai an pung zual a ni.

Kum 2020 March thla a Mizorama Covid-19 hri kai hmuhchhuah a nih atang khan hri kai leh kai lo endik zat hi mi nuai 19, sing 9, sang 9 leh 53 an awm tawh a. Chu'ng zingah chuan mi nuai 2, sing 3, sang 9 leh 801 in an kai tih hmuhchhuah a ni a. He hri leng avanga nunna chan zat chu mi 734 an ni.

<><><>

POWER

Mizoram in kawlphehta a mamawh san lai ber chu megawatt 181 point 62 a ni a, a thlen hun hi kumin January ni 6 tlai lam dar 5 kha a ni.

Rorellai ZPM MLA Pu Ginzala zawhna ziaka a a chhanna-ah Power & Electricity Minister Pu F. Rodingliana chuan he thu hi a sawi a. Kumin tangka kum kai lai mek, April leh July thla inkar chhunga State pawn atanga power Mizoramin a lei zat chu unit maktaduai 309 point 272 a ni a ti a. Fur laia power supply buai thin chhan chu furah ruah tam avanga leiminin electric ban leh power line a tihchhiat thin avangte, furah mau leh thingte a lo thang chakin, chu chuan line a tih fault thin vang te, tekin line a den chhiat thin avang te a ni, a ti bawk. Fura kawlphehta pek dan a buai chhan hi Power indaih loh vang aiin transmission leh distribution network ah khaihlak a awm thin vang a ni, a ti.

Fur laia power supply buai thin tih tlem a nih theih na'n 132kV Ring Synchronization Projects ruahman a nih thu Power Minister chuan a sawi a. LT bare conductor line te hi cable-a thlak mek a ni bawk a. Fur/ruahsur laia isolator chhia siamthat theih loh thin pumpelh nan isolator te inchhung (indoor) a dah tura ruahman a ni bawk a ti. Tun dinhmunah Mizoramin power leina bill ba a nei lo niin

a sawi a. Rooftop Solar hi Mizoram-ah kawlphehtha a pek chuah tam theih lai bera megawatt 7 point 7 pe chhuak thei bun a nih tawh thu leh mimal leh sorkar pisa in an hmante a huam vek a ni, a ti.

<><><>

A CHHUAHLAI

Mizoram BJP President Dr K. Beichhua chuan Mara zaithiam lar Pu A. Chhualai boral chu an ui takzet tih sawiin Mara tana mi bik leh rohlu a ni a ti.

Dr K. Beichhua chuan social media kaltlangin a ui thu hi sawiin Pu A. Chhuahlai chu Mara hla sa zinga mi bik leh rohlu ani a ti a, a hla chuan hun rei tak chhung Siaha mipuite a lo awi tlei tawh thin a ti a, a sulhnu chu an hre reng dawn tih sawiin an ui takzet tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

INDIA & UZBEKS

India leh Uzbekistan chuan an thawhdunna neih mek chu ti sangin Comprehensive Strategic Partnership ah an hlangkai. Ram pahnihte hian hun rei zawk daih tur Uranium sumdawnnaa inremna an siam bakah kum 2030 ah chuan dollar tluklehdingawn 5 tling pha tura insumdawn tawnaa tihlen an remti bawk a ni.

Nimina Prime Minister Narendra Modia leh Uzbekistan President Shavkat Mirziyoyev te Tashkent-a an inkawm hnuah heng inremna hi siam a nia . Hruaitu pahnihte hriatpuina hian Memoranda of Understanding (MoU) 11 an ziaak bawk a ni.

<><><>

PM

Prime Minister Narendra Modia chuaan nimin khan Uzbekistan ram chawimawina sang ber Order of Oliy Darajali Dustlik a dawng. Uzbekistan President Shavkat Mirziyoyev chuan Tashkent ah he chawimawina hi PM Modia hnenah a hlan a. Pu Modia chuan a chawimawina dawn chu India mi tluklehdingawn 1 leh vaibelchhe 40 chuangte tan a hlan a. Ram pahnihte inthianthatna tlo tak entirna a nih thu a sawi a ni.

Pu Modia hian Kyrgyzstan khawpui Bishkek a pan leh nghal a. Ni hnih a cham chhungin SCO Summit ah a tel dawn a ni.

<><><>